

四庫全書

史部

# 欽定四庫全書

史部

續資治通鑑長編卷三百

四十七至  
五十

詳校實檢討

臣

劉錫五

刑部郎中

臣

許兆椿覆勘

纂修官原任編修

臣

林樹藩

謄錄監生

臣

董誠

欽定四庫全書

續資治通鑑長編卷三百四十七

宋 李燾 撰

神宗

元豐七年秋七月己亥以奉議郎徐彥孚提舉荆湖北  
路常平等事彥孚知衛州黎陽縣嘗言青苗息錢可用  
常平法聽民非時蓄凶匱乏用抵保稱貸立期輸官不  
報又言保甲逃亡恐積以歲月寢虧本數乞立責正長

法下開封府界三路保甲司相度以聞故有是命 手  
詔李憲朝廷奉祀所用珪璧璋瓚常患乏良玉充用近  
歲于闐等國雖有貢者然品色低下無異惡石爾可博  
選漢蕃舊善於賈販與諸蕃蹤跡諳熟者厚許酬直令  
廣行收市并達是意於鄂特凌古等處求之無害 詔陝  
府西路緣邊諸軍戰馬並依河東麟州例不以上下槽  
支草料各七分知延州劉昌祚乞不以冬夏支八分上  
批戰馬在軍政固已要重今用兵未已適當乏馬所係

實大特依所乞陝西河北河東熙河路準此

庚子詔增韶州岑水場銅價從提點鑄錢司請也

辛丑新河東轉運副使范純粹為右司郎中

六月四日除運副

右司員外郎承議郎孫覽為河東轉運副使上批聞純粹與知太原府呂惠卿素有私嫌恐難協濟事故也

工部言知河南府韓絳乞修大內長春殿等欲轉運司支錢認買木錢萬緡從之夔州路轉運使王宗望乞

就成都府置榷鹽司即兩蜀產鹽之地置場其井盡榷

於官然後售之於民收無過一分五釐歲入無慮三十萬緡乃乞量損浦江鹽直庶幾興利除害以惠遠民成都府梓州路並為榷鹽禁地煎鹽戶赴官入中不得私賣買陵井監之井研榮州之應靈專置場各差監官其餘州縣鹽井少處就差稅務官兼無稅務處委令佐置場成都府置轉般都鹽務受諸場運鹽先留息錢一分為元買場課額令都務增腳稅約時價賣漸抑煎井常平鹽價畧計兩路共六百井大井日煎鹽千斤小井二

百計日收十八萬斤歲得鹽六千三百七十二萬約百斤之價為四千為錢二百五十四萬八千八百緡每緡收息一分五釐歲收息三十八萬二千三百二十緡乞降度僧牒五百銀十萬兩借兩路轉運提舉司錢四十緡為本俟三年撥還其本錢雖當用二百五十四萬有奇若以法支移止用今所乞數可足詔下逐路轉運司詳具可否利害以聞 四方館使榮州團練使涇原路總管姚麟乞以南郊奏子恩贈祖福一官詔以麟世有

戰功特從之 詔遣官於河北河東路依格按閱第一

番保甲事藝四方館使唐州刺史曹誦入內侍省東  
頭供奉官勾當內東門司閤安河北東西路東上閤門  
使樞密副都承旨張山甫入內侍省東頭供奉官勾  
當御藥院劉惟簡河東路

壬寅詔提舉陝西買馬官展磨勘二年以有司言歲買  
馬不及額也

癸卯提點開封府界諸縣鎮公事范峴言詔發開封府



界戶馬三千三百匹貼支河東麟延環慶逐縣戶馬已  
選發外少一千一百餘匹詔支京東西路坊郭戶馬其  
尚少數更不貼令岫具開封府界以故不起發戶馬數

以聞

六月九日當考

開封府言故宣徽南院使李處耘孫諶

故參知政事郭贄孫爰各乞祖繪像恩諶犯姦會赦爰  
詔本屬知縣決杖並編管未敢推恩詔並推恩爰與右  
職中牟縣管勾牧放未合羣馬侍禁李思道殿侍何  
淵各展磨勘三年以經制牧馬司言棚屋倒塌馬多死

傷也

朱本云事小不書

甲辰知河南府韓絳言伊洛暴漲衝注城中軍營欲望應被水災廂禁軍等第與特支錢及先修軍營其水北軍民被害續奏請詔經水災民戶令體量賑卹被水廂禁軍以差賜般移錢死者依漂溺民戶法給錢

舊紀書伊洛溢

浸西京新紀但書伊洛溢

大名府路安撫司言元城埽河抹岸決

橫隄破城見閉子城固護倉庫等詔北外都水監丞司

河北轉運司官親督閉塞城南橫隄水口

舊紀書河溢元城埽浸北

京遣使賑卹賜溺死者家錢  
新紀因之但改溢字作失字

知太原府呂惠卿言故

左藏庫副使張世規子拱自言父世規昨牽制蘭州與  
李經同出界今經遷一官父止賜絹五十乞辭賜別推  
恩詔世規累立戰功賜絹三百 涇原路經畧司言乞  
以彭孫該磨勘與遷官其軍功別推恩及陞都鈐轄差  
遣詔彭孫候磨勘畢以賞功除領團練使

丙午詔戶部員外郎張詢勾當御藥院劉惟簡賑濟西  
京被水災軍民并催督救護官物城壁等其合行事如

有違礙從宜施行 河北路轉運司言河水圍繞大名府透入府城乞多差兵夫船筏救護遣金部員外郎井亮采勾當御藥院梁從政按視合賑濟事如西京指揮廊延路經畧司言种諤上本軍出界進討分遣諸將討擊不順西賊收夏州至上書平白池等處有功人內第二等將副李浦等乞推恩詔李浦遷一官趙守忠李師古已死以遷官恩賞每資賜絹五十趙守忠百五十李思古五十給其家

丁未知河南府韓絳言近被水災自大內天津橋隄堰河道城壁軍營庫務等皆傾壞聞轉運司財用匱乏難出辦役兵累經剗刷府官職事煩多欲望許臣總額賜錢十萬緡選京朝官選人使臣各三十五人與本府官分頭葺補乞發諸路役兵三四千人詔轉運司於經費餘錢支十萬緡沈希顏往來與韓絳同提舉營葺及選使臣三員役兵於本路剗刷二千人如不足即和雇知太原府呂惠卿言麟府豐州守禦人闕已牒提舉保

甲司發保甲乞令提舉司官先撫諭并立調發約束之法從之又言已治兩不耕地初惠卿言臣伏思持久抗敵之計雖已分團兩番將士及會定新寨守兵而邊事未息人兵未可全減莫若廣勸公私耕種為急蓋邊戍所以久困者凡以貴糴而遠輸故也今若使邊地益墾則邊戍可益而無衆寡不敵之憂邊民稍蘇而無貴糴遠輸之患麟府豐三州兩不耕地可以時出兵開墾不惟歲入可助邊計無可誘致西賊蹂踐田苗設伏掩擊

比於深入不測之敵境勞逸不同臣已委官相度耕種  
伏詳橫山一帶兩不耕地無不膏腴過此即沙磧不毛  
今乘羌人來賓出兵防拓廣耕疾種因其蹂踐而掩擊  
之漸移堡鋪向外把截則不煩深入而拓地日廣并可  
以招置漢蕃弓箭手承佃或營田軍以抵戍兵則邊費  
省矣願推之陝西諸路又言官中貴糴內地遠輸增益  
戍兵國計所患而邊人多乘之以射利今廣耕墾賤糴  
價省邊費乃非所欲為必有設計謀動搖沮壞之人惟

朝廷主張督責則事舉矣詔陝西諸軍經畧司詳酌施

行三月庚申四月壬午可考此段與三月二十一日庚申所書同但彼畧而此繁耳當存一去一八年正月

二十七日云

云當并考

戊申禮部言西南程蕃乞貢方物舊不注籍如許入貢

乞依五姓蕃例從之詔夔州路轉運司指度比附一姓

人數解發又詔開封府推官李士良提舉救護陽武

埽給河東路二十將神臂弓萬從呂惠卿請也侍

御史張汝賢落侍御史知信陽軍坐言事失當也

事具甲寅



日王安  
禮罷時

詔涇原路將官毛政等五人各遷一官管勾  
文字潘班減磨勘二年張蘓循一資以涇原路經畧司  
奏軍功推賞未當功也 詔入內侍省東頭供奉官  
麥文炳衝替以管押輝和爾達鞏蕃部到熙河令人於蕃  
界內市快行馬等故責之

已酉上批付廊延路走馬承受李元嗣諸路牒報賊頗  
近並邊八九月必入寇或在本路或環慶涇原其勢可  
料惟賊來切勿驚擾則賊情可得處事不繆昨蘭州被

圍聞者狼狽朝廷為動心賴經畧司奏報循常中外安  
定自賊攻圍以致敗去無一毫失事惟得賊尸五萬耳  
所以上功悉改三官其餘守禦下至婦女格賞之外增  
賜金帛以鉅萬今本路新復城砦未經重寇可諭經畧  
司悉以熙河路已行事為準仍以軍賞明諭漢蕃兼聞  
蘭州賊退頗以併力攻城不鈔畧為恨今入寇懲艾前  
車縱兵四畧不可不防其餘更在愛惜矢石當時不輕  
發固已得勝之半矣明遠斥候最為大事可一一宣諭

朱墨  
本同

庚戌詔官員因公罪上簿者再上簿展磨勘一季會恩  
免者以二當一 詔廊延路未句收積剩錢公據二十  
二萬六千餘緡給陝西轉運司 詔西河下水私船載  
穀應輸力勝錢而迴避詐匿不輸者計不輸物數論如  
非提舉汴河堤岸司船棧輒載西河鹽棗穀陶器皂莢  
過西京及入汴者雖經場務出引投稅許人告捕罪賞  
依私載法都大提舉汴河隄岸宋用臣請下戶部著為

令朱本云事小不當書今依新本復存可見宋用臣等言利析秋毫也

詔虔吉州界並

為禁銅鉛錫地分從戶部請也

辛亥詔自今景靈宮朝獻日遇雨雪令宰臣親王執政

官分獻定州路安撫司言軍城寨言北界兵千人擁

牛具過石城南耕黃貨谷地巡歷人不能過已指揮當

巡官吏毋得透漏及牒保州沿邊安撫司移牒北界止

約詔圖上北人所爭地具前後照據以聞大名府路

安撫使王拱辰言河水暴至北京數十萬衆號咷求救

凡百施為皆是出違條貫臣須至奏請乞賜一不拘常  
例指揮又言凡干錢穀稟轉運司常平即提舉司軍器  
工匠即提刑司埽岸物料兵士即都水監未嘗有一敢  
專者今應猝濟民逐官在遠須至一面先行致違逐司  
條令所以乞賜一不拘常制指揮上批其事干機速委  
是奏覆牒稟所屬不及者仰依所乞施行

壬子朝獻景靈宮

癸丑分命輔臣祈晴 左藏庫副使帶御器械劉承緒

為禮賓使嘉州刺史手詔以承緒妻建安郡主即先帝  
同母妹故擢之 詔雍王顯乳母孫氏葬報先禪院每  
歲同天節度一僧

甲寅尚書左丞王安禮為端明殿學士知江寧府初侍  
御史張汝賢言吏部以王珪陳乞子仲端勾當京西排  
岸司礙選格而本部留闕妄作行遣又王安禮乞子枋  
勾當九龍廟見任官二人有溢員吏部言當使闕去年  
孫固陳乞子野勾當裁造院礙法吏部具特旨例申稟

而都省批令具鈔及安禮陳乞姪游監泗州糧料院則  
援野為例韓鎮之姪宗迪指射尚衣庫又以游為例此  
乃引用都省批狀例外起例陛下之法遂格不用此弊  
相襲實害大政乞賜施行

六月甲午  
汝賢奏

上以珪子仲端已

退所乞差遣而安禮子枋姪游差遣有條許用例奏鈔

汝賢章格不下安禮聞之面奏乞治汝賢之罪上宣諭

可且令分析

六月丙申  
汝賢分析

又云汝賢嘗言卿平日以惡言

恐脅言事官因道汝賢所陳安禮之語安禮乃言昨日

論奏張汝賢彈奏臣乞差遣事蒙宣諭汝賢奏以臣嘗有惡言詆毀欲頭壁俱破切緣汝賢官侍御史以言為職彈奏輔臣亂法當出於至公不可苟用怨憎妄摭非罪使臣實嘗詆毀聞者豈宜傳達汝賢雖知在法親聞乃坐况臣初無詆毀之事是必姦險之人以無為有欲激怒汝賢使中傷所惡之大臣而汝賢率情快忿亦昔所未有此而不治於綱紀風俗其害不細乞付有司盡理施行上遂令汝賢分析汝賢奏臣追省當日所聞大



概正是安禮因臣論奏王珪等誣上行私輒有及臣之言謂或議已則當致害又有御史青蟲可憎之語臣以其意凡陋固未嘗盡列於朝旋觀安禮外雖狂率中實姦險嫉忌一言及之必為中傷之計屬者臺諫相繼罷黜安禮盖有得色嘗以此誇銜同列之間臣自顧踈遠蒙陛下擢任不次報宜如何豈敢愛惜以避安禮之暴橫屬聞此語是亦安禮平日之常談臣因上殿口奏者獨冀清衷照察安禮所存實非愚臣苟用愛憎据撫非

罪昨因察按論列宰臣執政官陳乞差遣而安禮兩次  
並是違法都省特旨舊例直行指揮具鈔擬差臣職在  
言責豈當有隱乃實出於至公未嘗率情快忿安禮惡  
其及已必欲置臣於罪莠言自口輕躁無恥昔所未聞  
況安禮素行貪穢所至狼籍名在儒館則日出游於淫  
舍湖州潤州身任太守娼女共政淫穢不忌陛下始以  
其兄安石之故畧其舊惡擢置政府然安禮惡不可掩  
罪不可解知潤州日部內致仕官刁約館閣故老安石

以丈人行事之而安禮數飲約家輒私其侍婢約死乃  
以主喪為名誘畧其婢王氏謝氏二人以歸今二婢在  
家王氏仍已有子閨門之內數致忿爭至或挾持私事  
欲以告官而安禮多方以捍之蓋取之不正則勢必至  
此安禮修身治家如此其能為陛下正百官理萬民乎  
安禮與其兄安國素不相能及聞其喪無甚哀感喪假  
僅滿呼妓女燕飲嬉笑自若安禮於所厚者薄其能為  
陛下勵風俗勸忠義乎安禮喜結四方豪富如杭州俞

緡東南大姓賈販小人未嘗為安禮門客特以賄交去歲大禮遂奏緡為假承務郎安禮黷貨如此其能為陛下守法令杜請託乎報慈寺僧詞海乃異時安禮淫污之淵藪出入安禮家人不呵問道故時淫邪之游以為笑樂無所不至兼安禮自秉政以來何補國事惟自顧行實如此則無以厭服人言故揚虛聲取悅流俗牢籠士大夫以賣恩招權歛譽在已歸謗朝廷然安禮辨詞亂實陰計害物故士大夫莫不畏其凶馘而安禮平居

猶恟恟不自安者獨以臣輩尚在言路軋其姦萌竊惟御史耳目之官本許風聞言事惟禁中語不可泄漏至於大臣之言雖涉詆毀既非親聞自不合坐則傳言之人又何罪焉臣前所聞既未嘗論列而陛下亦不以此為安禮之罪而安禮遽乞付有司根究者意謂就使是實於已無罪但欲有司承望風旨曲求差互使罪之所歸不在於臣則在於傳聞之人如此則安禮別有罪惡誰敢談說况御史位卑而無權不足以動事惟執政大

臣喜怒能為天下禍福身居至近勢軋人主則防檢之道不得不嚴故責在御史繩姦糾慝以坐制其非心今安禮乃恃大臣之威欲以鈐制御史杜絕言路則安禮之志殆將何為上以其章付三省謂安禮曰汝賢彈奏卿子姪差遣用例奏鈔在法所許汝賢固有罪其言卿姦巧事卿果如此何以復臨羣官安禮猶辨訴因奏往以安石疾病嘗乞知江寧府願申前請汝賢又言臣論奏王珪王安禮陳乞子姪差遣法許用例奏鈔詔臣分

析臣愚見按法之文而折中于理謂有司之事無條有  
例或雖有條而文意未明應用例以補之皆在所司可  
以常行於法未礙則為不應奏請可否之事若陳乞差  
遣自有定法異時執政大臣本因礙法遂有干請畫旨  
施行所以稱特旨豈有司所專以為不應奏請之事又  
官制申明逐處例冊候冊定條目不用即知有司所用  
之例自可修條未知特旨礙法之事能如此否又尚書  
省奏事依條目分有法式者上門下無法式者上中書

并取旨特旨事乃中書之職臣竊謂法式者有常之稱  
特者反常之義今用特旨礙法事為有法式事上門下  
臣雖甚愚未知其可且特旨一也參以近者察案所上  
有待申請而具鈔者王安禮陳乞是也有不待申請而  
具鈔者時忱磨勘是也有申請都省而關中書取旨者  
文彥博陳乞是也有申請而進呈不行者程慶酬獎是  
也都省若為有例事不限特旨皆不應奏請可否便得  
具鈔則宜無彼此之別不可於執政大臣與本省吏人



私事而遂有異若謂例冊有之始可以用印楊天祐等  
豈非例冊所載何為而不引其馮訴借闕事乃非例冊  
所載何為而輒用若為侯永昌等酬獎礙條法有特旨  
不可引用則王枋等差遣正礙陳乞之法若謂特旨非  
有司所專而都省可以指揮則時忱磨勘又不得申請  
而施行推求其說終不可得異時執政大臣特乞子姪  
差遣多緣私計所便自瀝誠懇以干朝廷今則其家子  
姪自赴吏部指射皆得施行不惟相承無有紀極而於

朝廷事體實未允協大抵有司差遣皆有常法而不可亂自法度之外或戚里之家干乞則有內降或大臣之陳請則有特旨其事一也今戚里之家或告陛下乞一優便差遣既蒙俞允付外與差三省尚須覆奏而後行今大臣之家自詣吏部違法指射而所司遽自與之上下之體臣所未諭蓋聞事變萬殊至當無二天下之人孰不有口有心使言之而不當則有心者能察其非有口者能議其否如是而日黜百人誠何損於事體使言

之而在疑似是非相半以此得罪不能自明則言者之  
氣十已喪其六七使言之而當則有心者莫不知其是  
有口者莫不稱其可如是而猶不免則敢言之士氣索  
矣況中人以下者乎如是則大臣之過其敢復有論說  
者乎臣近又論安禮素行貪穢所至狼籍以至私人之  
婢而因喪以取之利人之財而鬻爵以償之家有不正  
之配身有不悌之惡非臣私言著在士論然安禮平居  
語人則曰固嘗首露於陛下之前陛下知而赦之天下

有識之士方以此語為感言事之臣亦莫測其信否姑置而未論然臣竊謂若陛下幸赦安禮之罪而安禮叨在政府亦宜少有悛心以無負眷遇而怙終放肆了不自新臣今日之論乃在辨正朝廷法度而安禮以姦險之性當躁忿之時語言輕率必不循理是亦無逃於聖鑒而臣自顧以兀立之孤跡獨當衆人之論尚慮蔡確李清臣輩與王珪安禮為朋比論議之際或有僥倖同利之心使臣忠憤不獲申於公朝伏望斷自宸衷使臣

言得行凶邪去位臣雖萬死無恨上既罷汝賢安禮亦

求去故有是命

舊紀亦不書  
安禮所以罷

乙卯雄州言拒馬河溢破兩輸長沙河口已放急夫候

水落興功 觀文殿學士光祿大夫知成德軍馮京知

河陽 詔判大名府王拱辰罰銅十斤館陶尉姜子厚

冠氏尉桑嘉之知縣鄭僅各罰銅八斤坐擅役保甲會

赦特責之僅彭城人也

僅初為大名府司戶部使者檄  
往他郡留守文彥博曰如鄭參

軍豈可令數出奏易司法徙冠氏令河決府西檄夜下  
調夫急僅方闕保甲盡籍以行先他邑至決河遂塞使

者怒劾之彥博言於朝曰微冠氏令城中其魚矣詔釋不治此據鄭僅傳傳云釋不治實錄云罰銅八斤未知孰是又按文彥博以熙寧七年四月留守大名元豐三年九月徙河南六年十一月請老當七年河溢時留守大名者乃王拱辰傳誤也或言於朝乞免劾僅實王拱辰又拱辰與縣令佐並罰銅謂詔釋不治亦非也今不取姑附

注此

戊午新河東轉運副使范純粹言昨在陝西朝廷每給軍須並計綱雇夫起發頗為勞擾乞自今給河東陝西邊用非應副機速者並令小作綱數排日遞送從之詔河北河東被水保甲令州縣考實賑濟小保長保丁

一石大保長二石都副保正三石提舉保甲官分詣諸州照管具賑濟人數以聞 詔陝西河東蕃官蕃部轉職名及因事酬獎者當書其實年於付身文字本路直補轉者準此

已未上批昨尚書省議寬減京畿戶馬人遂放弛全不應令蓄養帳內但有馬數因事調發乃見其情開封府界提點范峴及知開封縣李括所奏如可行宜令兵部條具以聞兵部言峴奏戶馬未買或乘往別路未回或

有病未發如當起發卽及一綱乃發本部看詳如乘往河東陝西路者乞就支餘如岫請及如括言馬已起發者限三年買足從之 滑州言齊賈下埽河水漲壞浮

橋詔范子淵相度以聞河北陝西開封府界準此

庚申召輔臣觀穀于後苑分命輔臣謝晴 詔秋銓試

上等一人循一資中等二十人不依名次注官下等七

十八人注官 給空名宣三百付熙河蘭會路經畧司

同管勾西京路保馬呂公雅言奉手詔聞本路保馬



極苦難買衆既爭市價亦倍貴至駕者不減百千深恐  
本司近奏所買之數過多民間未悉朝廷取效在遠之  
意遂致如此宜更消息考驗但如元令聊增其數可也  
臣今相度當減每都之數今約年終各以八匹為限新  
令施行人率樂從不聞畏恐及本路每都一分四匹今  
畧增倍若買二分八年可足其山僻縣展為十年從之  
本志有之六月  
十二日可考  
提舉京東路保馬霍翔言本路已買  
保馬萬一千匹及據淄州淄川登州蓬萊等縣有弓手

願養保馬已印給見勸諭弓手願養馬之人候數多續

具奏未幾又言弓手願養保馬每縣不限人數每名各

養一匹從之除補限外依條聽

志亦  
有之

知延州劉昌祚

言昨集教保甲弓馬並不精當但令守禦已用士兵換  
赴將下團結成隊遇敵呼使如有功優賜推恩從之

前廣南西路提點刑獄劉宗傑言昨任京西路轉運判  
官累奏知鄧州劉忱轉運使陳安石推勘官郭槩等情  
獎見送御史臺定奪昨臣出巡在外聞劉忱縱吏受贓

斷私酒事不法與陳安石相為表裏故入楊千徐宗等  
徒罪臣謂忱安石等豈獨輕臣乃是違慢詔令遂差襄  
州通判王子明推鞠忱等情弊適會臣移廣西安石等  
乃變其獄陷子明於罪罰臣因論奏刑獄冤濫郭堅雖  
能辨正楊千徐宗不應坐徒及王子明非私罪即不劾  
劉忱陳安石遂具駁奏下有司歲餘終未結竟望特省  
覽則十年冤滯之獄無所逃於天鑒上批京西獄事久  
經辨訴是非之情終未明決可并塞序辰劄子遣御史

劉拯即鄧州鞠之

後竟如何孫升論宗傑為比部郎中因執政與中丞協比追攝下獄責知

鄧州當考年月

辛酉權發遣江淮等路發運副使將之奇直龍圖閣之奇歲漕計復以六月辦奏計京師故有是命手詔李憲勘會諸路團結到役兵工作日久人力疲敝兼邊廩耗費萬數不少若不於工役稍見涯涘之際節次減放則費用滋廣頗有侵蠹宜候八月末工緒有涯以遠近節次放歸訖奏

壬戌御史黃降言朝廷修立敕令多因舊文損益其去  
取意義則具載看詳卷藏之有司以備照用比者官司  
議法於敕令文意有疑者或不檢會看詳卷而私出已  
見裁決可否乞申飭官司自今申明敕令及定奪疑議  
並須檢會看詳卷考其意義所歸所貴法定於一無敢  
輕重本臺亦得以據文考察詔下刑部刑部言元豐敕  
令格式看詳卷共二百二十冊難以頒降乞自今官司  
定奪疑議又申明敕令須看詳卷照用者聽就所掌處

抄錄從之

甲子詔三省吏行遣斷絕差賜銀絹著為令 知滄州

趙瞻奏河北鹽法漸已就緒乞自大名府澶恩信安雄

霸瀛莫冀等州運盡行權賣以增其利從之

趙瞻奏  
當考

乙丑奉議郎劉摯知滑州摯前為右司郎中坐事衝替

故復之 詔蕃官內殿承制鄂特凌葉為左藏庫副使以

討西賊於雙池再戰皆重傷及獲小首領一級也 知

邵州關杞言置芙蓉石駟峒寨柵乞差二百騎防托詔

廣南西路鈐轄司與百騎 樞密院言交趾使人見辦  
議疆至全未聽伏恐邊防尚須警備詔熊本緣邊城寨  
及守禦次第有未周備事悉意措置具如何施行以聞  
六月四日本已除吏侍當考何日離桂州并後來如何措置八月九日十九日二十一日可考

丙寅廣西經畧安撫司乞於融州王口寨置轉買務通  
漢蕃交市乞度僧牒三十為本從之 陝西轉運司言  
通判延州吳安憲準詔與鄜延路經畧轉運司籌度於  
要近城砦多聚糧草延州秋稼豐稔民戶不能蓄積以

待價必為射利之人乘時賤取閉糴以待官場之急延  
州諸縣去城砦近者十里遠者百里今秋應納青苗免  
役為錢十三萬緡欲定地理遠近加饒法令民於諸城  
寨拆納轉運司撥還提舉司本司勘會廊延路上下番  
將兵並在極邊今又增四將馬軍及戶馬二千人供餽  
不易如安憲所言公私交便從之 詔除名均州編管  
人前漳州軍事判官練亨甫移郴州編管坐與有服兄  
劾同取雜戶女穢濫也



丁卯手詔提舉陝西買馬監牧郭茂恂乞赴闕奏事茂  
恂在職數年全無績効此乃欲憑藉口舌開釋罪戾宜  
止令具所見附驛以聞

綱要云是月河北路始并大名府澶恩等十州官皆權鹽

--	--	--	--	--	--	--	--

欽定四庫全書

續資治通鑑長編卷三百四十八

宋 李燾 撰

神宗

元豐七年八月戊辰朔門下省言刑部奏鈔宣德郎樂  
京據例當作情理稍輕不礙選注京本坐言役法本部  
不敢用例詔樂京情重刑部引例不當

朱本刪去新本  
復存之樂京事

已見熙寧四  
月十二日

熙河蘭會路經制司言岷州蕃兵將趙

惟吉康谷寨主夏亮坐前任隨知岷州張若訥役禁軍  
修教場衝替乞許其自新宜令依舊詔趙惟吉夏亮許  
留在任各展磨勘二年 荊湖路相度公事所言

孫覽相度

公事見五月二日又十一日

王江一帶自大湓口以上接連檀溪諸

蠻與今道路相接朝旨專委管勾廣西經畧司機宜丈  
字程節招納措置本處地理闊遠蠻已歸附須築一堡  
寨以為守備詔節相度節言王江上流地名安口控扼  
諸峒其地寬平可建城寨然由王口而上經大湓吉老

江口皆生蠻獠團族惟以畧峒民板木為生今雖效順各有俸給若建城寨亦須兵威彈壓今欲沿江及中心嶺各治道路漸進先置堡鋪於古老江量留兵丁以防鈔截糧道然後安口可以即工又言王江一帶團峒東由王口三甲西連三都樂土南接宜州安化與誠州新招檀溪地密相鄰比熙寧中嘗遣承制劉初領兵丁置寨於安口諸蠻併力殺傷官軍自此蠻情愈更生梗今徧招納例皆效順當開道路置堡寨驛鋪分兵丁防守

乃為久安之計又緣事干西路須與誠州同時措置庶

使諸蠻力有所分易為辦集並從之

五月二十七日可考

御史

寒序辰言聞京西麥斗錢不過三十轉運司乃令稅戶

折納錢六十以上詔京轉運司具析以開

朱本以為事小削去要見

後來如何

已已詔以廊延路經畧司言新歸順三班差使馬奇特追躡西賊被傷死昨密科川獲級未賞有子沙木紫詔馬奇特來降招誘人戶數多又累立功沙木紫與三班借職賻錢

三十千絹十匹獲級當遷三資給絹六十匹

庚午新提點夔州路刑獄朝議大夫裴士林知澶州先是河北路轉運判官張適劾奏知澶州呂希道郡事不治境內賊盜充斥致煩朝廷專官捕逐未獲乞重置朝典上批裴士林今日在殿訴陳以母親高年遠行不便乞易一近地差遣契勘士林累典劇郡頗有幹力可令替希道赴闕其夔州路提典刑獄別選人具名進呈始希道除知澶州辭日上諭曰以河徙欲鎮安百姓執政

進擬從官朕選用卿希道至澶以治績稱秩滿再任河朔保甲白晝持梃公然為盜教隊巡檢和德挾提舉司勢因緣枉法掠聚貨賄監司隱忍不敢詰希道發其贓狀僚屬皆惶恐希道即獨奏其事捕德下獄提舉官聞之馳驛至澶取保甲囚盡釋之希道曰山可移獄不可變既窮治取其首領於刼掠處斬之餘皆配隸澶人感泣朝廷亦命他路監司審其獄皆實重貶德自是提舉司益不協保甲有犯法者諸邑稍加懲治則必反中以



他事希道檄諸邑保甲犯法有疑必送州至則悉論如

法提舉官怒欲劾希道其同僚以希道辭直不敢書狀

乃已元豐五年夏河東注靈平埽

事見五年七月壬午

一夕潰岸

幾決希道曰此正前日之曹村也事不可再即馳至河

上自督役河得無虞先是河決小吳

四年八月八日河決小吳

南直

靈平下埽甚急當歲有水患乃請開大吳口導河循西

山北流論者以為得禹之舊迹自是曹村無水患矣張

適為轉運判官

適除運判乃六年十月

上河朔鹽利以助邊計詔

推行之希道曰祖宗手詔在北門地多斥鹵民所衣食  
故通鹽不禁河朔之人可安不可擾適深恨怒初澶河  
未徙南北城相望河貫其內故并河為禁地河既徙而  
北流有盜十餘人劫掠他州縣夜道退灘適因奏彊賊  
由城中過法當按責守臣希道遂罷

此據范祖禹誌希  
道墓須更考詳八

年四月二十  
一日適責官

右侍禁杜能自陳有邊功御延和殿引

見賜人馬甲一聯 詔內臣殿侍管押戶馬往陝西河  
東路司勲取死損見在分數等第以聞 真定府路安

撫使馮京言洛州水災漂浸公私廬舍詔轉運司限兩  
月修完 樞密院言蠻乞弟昨棄巢穴而遁今聞無所  
依止詔王光祖遣人招諭乞弟許出降與免罪補名目  
於近邊勾當是歲乞弟死 權河北轉運判官張適言  
已遣第十五副將王文景領兵捕殺澶州界羣賊權令  
選乘馬鋪馬七匹詔張適不當差馬鋪馬給將下特釋

罪

朱本云事  
小不書

辛未詔禮部侍郎李常罰銅十斤膳部郎中曾有開與

宮觀差遣坐修條不當也 熙河蘭會路經畧司言昨夏賊圍蘭州蕃官三班奉職章鄂特把隘伏截得力雖不獲級乞恩詔章鄂特遷一資換本族巡檢 詔宗室

有期以下服既殯許嫁娶毋得用花綵及作樂著為令

御集尤詳  
今從實錄

河東路經畧使呂惠卿言河外緣邊秋稼

登稔可市糧草依將來官糴價與轉運司易錢鈔及令內地支移民戶出脚直以便公私乞先給錢三十萬緡在京椿管許以償本司糴買鈔撥本司舊封椿芻糧為

年計以所糴買封樁歲終以聞從之仍支未鹽錢三十萬緡給事中韓忠彥言吏部奏鈔擬注江寧府司錄參軍前刑部法直官郝京試大理司直不坐條而引例既有著令自當奉行豈可廢條用例詔吏部郎官罰銅十斤都省郎官六斤

癸酉中書省言澶州賊單安等劫縣鎮民物頗有徒衆未獲詔左班殿直武學學諭陳濟方募選兵三百指名抽差使臣兩員準備差使迹捕其賊所至捕盜官等並

取濟方指揮

甲戌秦鳳路經畧使吳雍言秦州糧草纔支半年望賜  
錢三五十萬緡依五路常平法計置詔戶部支常平積  
剩錢二十萬緡 湖北轉運都鈐轄司奏相度誠州已  
納抄劄到歌樓橫嶺等團畸零人戶各在潭溪與招賞  
團峒相雜居止於蠻情顯有形比乞加犒賞等從之又  
奏為誠州三班差使楊晟祝係首先納土歸明今來潭  
溪等團峒已行招納了當乞與改官或支賜詔與三班

借職

密記八月七日事五月二日又十一日七月四日八月一日六年五月十三日當考

乙亥戶部言提點河北東路刑獄呂仲甫乞二浙歲散和買紬絹止用舊價支鹽三分本部下其事本路轉運鹽司相度言不便詔兩浙轉運提點刑獄提舉鹽事司

同相度

竟如何當考

手詔劉昌祚前機宜官徐勳等本因

帥臣失於檢察以致違法敗官聞今來本司官屬尚因前弊玩慢弗悛審如所聞不可不治可更體量違法重者彈治以聞事理稍輕即嚴戒敕以提舉永興等路保

甲胡宗回奏鄜延路經畧司勾當公事曹輔等不公故也

丙子手詔李憲西邊用兵未已行陣之間戰騎為急今諸路奏陳皆以闕馬為言除本路收市外如何經畧可以廣置駿足入塞爾目擊其事宜知其詳可速具方畧以聞無有回隱

朱本

都水使者范子淵言相度滑州浮

橋移次州西兩岸相距四百六十一步南岸南崖地雜膠淤比舊橋增長三十六步半詔子淵與京西河北轉



運司滑州同措置修治 監察御史來之邵為將作監

丞先是御史中丞黃履言臣與張汝賢同薦御史汝賢

嘗與之邵為僚稱其習熟法令故列上之今遽聞之邵

雇雜戶女為婢有此汚行乞付有司根治詔之邵具析

之邵聞履彈奏即急出之乃言近買婢張數日問得恐

是襍戶即遣出故有是命 五月乙巳初除御史 詔知桂州熊本

已除吏部侍郎候辨正地界事畢聽朝旨赴闕 六月四日壬申

已除吏侍此特申明耳七月二十八日乙 詔樞密院

丑此月十六日癸未二十一日戊子可考

諸班直每轉員出職內是長入祇候已有陞軍恩例以  
病故不得遷者皆補外處本城無陞資指揮自今與陞  
一資

辛巳鴻臚卿陳睦為遼主生辰使西上閣門使曹誘副  
之奉議郎試右司員外郎范純粹為正旦使文思副使  
侍其壻副之 陝西轉運司言今秋民戶稅乞許本司  
酌遠近支移以實緣邊從之毋過三百里 詔洺州水  
災糧儲不足許借鄰近州縣常平倉米麥小豆共五萬

石限三年還 詔李憲權以職事付趙濟發來赴闕應  
緣本路防秋事委濟經畫

壬午詔聞三省樞密院官常早出六曹諸司不暇結絕  
日務自今冬夏並以未初為限著于令 瀘南緣邊安  
撫司言羅始党斗然斗更等首領乞依十九姓團結為  
義軍欲遣官管勾團結分地把拓立職級管轄從之

癸未上批京西民產寡薄今歲復罹水災兼累困河役  
范子淵見營閉武濟河口昨已放工無效今冬雖霜降

水落又須廣費財力未可保其必成即且縱其分流據  
年例物料兵夫固護武廣三埽自於新河無害可遣開  
封府推官李士良審視士良還奏所修馬頭隄道實未  
可保其必成乞並罷從之

四月二十二日  
子淵責

樞密院言諸

路諜報西賊大點集若至秋深入寇諸路方出兵牽制  
淺攻別無所得徒困兵馬若不乘其未備掩襲使賊得  
併兵一路為寇於枝梧亦為費力詔陝西河東經畧制  
置司選人深入鉤探如對境一二百里有賊兵不至重

大及有收秋人戶住止可以修往忽歸乘便討殺即度  
事力發將兵仍計萬全毋得深入虛空之地 詔交趾

所議疆至據近日奏報已稍見涯溪新除知桂州苗時  
中諳熟彼方蠻夷情偽處畫庶務宜不在熊本下蕪本  
已有改命恐於職事不肯任責可趣時中不候般家先

次乘遞馬疾速赴任

此據御集初九日丙子  
二十一日戊子可考

乙酉詔河東陝西發保甲給路費出本州界二百里以  
上保正三千副保正二千大保長千小保丁七百不滿

二百里及緣邊不出州界二百里以上保正二千副保  
千五百保長七百小保長保丁五百

丙戌都大提舉汴河隄岸司言京東地富穀粟可以漕  
運其廣濟河下接逐處但以水淺不能通舟今以本司  
近修狹京東河岸開斗門通廣濟河為利甚大今欲於  
通津門裏汴河東城裏三十步內令修城兵就便開河  
一道取土修城及至斗門上安水磨下通廣濟河應接  
行運從之

元豐五年二月十一日初罷廣濟  
河運七月二十日六年九月四日

上批諸

將兵馬平日固已多困於役使難得專意武事近復檢  
束將副太密多受制於州郡縱有材者亦罕得展四體  
盡力法守除三路上有帥臣可以責委外開封府界京  
東西路專選委監司一員提舉開封府界王球京東呂  
孝廉京西梁燾如保甲例以內臣一人承受奏報令不  
以時點檢教事每歲如保甲遣官案閱手詔孝廉朝廷  
以本路將副類多武人少閑文法致所部兵馬累煩朝  
廷督責未嘗登額及教閱擊刺行陣多不應法蓋武人

不能省閱朝廷頒付法式致廢而不舉兼上無主司赴  
訴縱有曉職守者其趨公之心亦無從得伸今專委卿  
提舉本路將兵職任事權並視已頒提舉保甲法施行  
卿其仰體選付之重往來點檢督責早令事藝修進行  
陣精熟人馬元額速得登辦緩急調發四方戰守足可  
保持立功無踵前日虛數空名而已

戊子尚書省言聞今歲廣西秋稼大稔粒米狼戾正宜  
蓄積詔廣西提舉常平司乘時廣糴計議辦正安南



疆至成卓言已與黎文盛等辨正乞降詔加恩賜詔熊  
本問成卓黎文盛公牒及面議並言不敢爭占儂智會  
儂宗旦所納州峒何因即乞降詔熊本言成卓據黎文  
盛狀如成卓議於勿陽順安等峒從南畫斷地界陪臣  
不敢爭執即是辨正明據詔以隘外八處縣峒賜交趾  
仍賜使副大衣著黎文盛五百阮陪三百

八峒不毛之地  
地事具六月

四日壬申及十一月二十二日戊  
子六年六月四日始令成卓辨正

詔熙河蘭會經畧

安撫司訪問蘭州並河至靈州度河至興州通道有幾

具地里遠近迂直以聞 詔寺監諸司應有稽違係所轄省曹寺監失點校者亦令臺察彈奏

己丑皇第十一子侯為定武節度使成國公

舊紀書侯為節使國

公新紀不書節使

詔禮部員外郎何洵直入內東頭供奉官

勾當御藥院劉惟簡同參定諸陵薦獻供奉式 禮部

言社稷之祭有瘞玉而無禮神之玉開元禮奠太社太稷其玉以兩圭有邸乞下有司造兩圭有邸二以為社稷禮神之器從之 刑部言南蕃進奉人石以定過汝

州襄城其下人毆擊市人及自毀敕黃以定等外蕃當  
自朝廷指揮外其敕書已關主客押伴使臣乞候回日  
下大理劾罪詔敕書不別給止令汝州具喧競毀敕書  
因依連所毀敕送廣西經畧司謄牒送界首官司付本  
蕃押伴使臣依刑部所申 權國子司業朱服言天下  
郡縣之學皆隸本監四方之士多出太學將來禮部試  
慮諸路舉人羣集京師自以不在學籍無糾禁稽察之  
法循緣舊習浮縱寡恥兼本學生交雜相為掩蔽難以

辨究乞應舉人到京或有顯過虧損行義若博奕鬪訟  
酗酒不檢造為飛語謗訕朝政委本監檢察聞奏比附  
學規殿舉從之

辛卯雄州言準朝旨依高陽關鑄城下九鐵水窻工料  
以數十萬緣今窻上下城塹堅固本州最處極邊若置  
鐵窻須開搬城身面三十尺底十尺不惟虛費功力亦  
慮張皇欲漸計工料候有水窻城墮損處修換從之  
詔堂除及吏部使闕知州自今三年為一任 詔諸提

舉常平司存留一半見錢以二分為市易抵當 詔於  
絳州垣曲縣支息錢六萬七千緡付河東轉運司應副  
芻糧

壬辰手詔劉昌祚近指揮諸經畧司乘隙出兵蹂敵秋  
稼慮獲事已畢戎騎乘秋健集之時加之邊吏伺候滅  
裂萬一逢賊誤國不細卿更籌畫如未可出即謹守前  
約內外備戒勿承順朝廷一時指揮妄有舉動 詔江  
南西提舉鑄錢朝議大夫錢昌武致任江東提舉鑄錢

朝議大夫李榮衝替昌武坐妄奏榮處置乖方當徒二年榮坐不實當徒一年各會赦而昌武年七十二故也恩州總管信州團練使孫古滄州總管辰州團練使劉聞等並以年高令致仕

癸巳監舒州石溪鎮酒稅奉職楊茂盛貸死除名郴州編管坐百姓乘馬過務搜得稅物笞之致死也 詔河

南府被水諸軍借一月糧見尅納者並除之 詔內藏

庫使榮州刺史涇原路都察知鎮戎軍張世矩追兩官

免勒停罷都監領榮州刺史權知鎮戎軍坐先為河東軍馬司上出界功狀效用賈仲寶重傷不實盧秉等言乞少寬假詔候案上取旨故也 詔諸路發往陝西戶

馬有眇目或目單暈者即退令別買 詔自今彊盜須州縣委不能制或克惡巨蠹十人以上方得選募將兵捕殺若本州有本屬將下兵即先選募或不足方得選募將兵捕獲如違開封府界京東京西路委提舉將兵官餘路安撫總管鈐轄司舉劾 樞密承旨司比較京

東京西路諸將副押隊訓練官軍員教頭賞罰詔京東  
第八將副梁最趙潛京西第五將副張選孫璉各減磨  
勘三年京東第二將副歐育史吉京西第一將副蘓贊  
王政殿各展三年 衢州言資政殿大學士守太子少  
保致仕趙抃卒輟視朝贈太子少師謚清獻

甲午上批諸路諜報西賊廣造攻具竭國點集聲言欲  
入蘭州慮守臣將士狃於前勝輕易待敵或為誘戰別  
致失宜令康識往蘭州與當職官經畫為備及募人深



入刺候如賊果入寇務在謹重過於去年照管守禦兵將晝夜悉力應副以取坐勝仍度人情時與犒給候大河水平開方得往他處巡歷

乙未都提舉權茶陸師閔言川茶之法肇於熙寧甲寅行之陝西既有明效以河北河東生聚之衆惟茶不可一日而闕若視陝右成法而歸利於公上度兩路歲費之數置官場於荆楚間和市歲計運至兩路率用陝右禁地之法本路俱積以助邊費詔師閔條具以聞尋下

兩路具到合用茶數及進呈詔寢之

朱本刪去云不行合刪按此乃神宗

盛德安可沒也仍具存之

江淮等路發運副使蔣之奇乞復行東

南大路權茶法進呈不行

朱本又以不行刪去今復存之

權發遣同

經制熙河蘭會路邊防財用馬申乞免熙河路封樁新  
復五州軍闕額禁軍請受詔自今更不封樁其已封樁  
者撥與經制司

丙申詔支常平積剩錢五十萬緡付熙河蘭會路經制  
司市糧草 詔武臣知州軍及軍使並三年為一任

都提舉汴河隄岸司乞歲買建州臘茶十七萬斤依官  
綱例免稅至京抽十分之一送都茶庫都茶庫所賣茶  
本司乞歲買三萬斤隨新陳作價並從之其市易務茶  
令商議定價如不售即申所屬出開封府界變易 詔  
熙河路經畧安撫制置司奏西蕃董戩送到蕃字以夏  
國遣首領來青唐城欲同董戩首領入漢議通和事已  
降指揮令差使臣一名引伴赴闕可續指揮令經畧司  
審驗如委有夏國表文及奏陳事即如已降指揮若是

與邊臣商量仰先具奏

據御集乃三十日丁酉事今附此不知後來竟如何此時董戩

已死鄂特凌古繼立但未發喪耳

九月戊戌朔樞密都承旨張誠一言樞密都承旨月有職錢三十千準祿令武臣正任節度使以下不給添支詔特給又詔給李元輔經制絹五千付秦鳳路經畧司以賞功 樞密院言夏國欲因董戩遣使乞通和其意未可知慮欲以此疑本路邊備詔制置司過為隄備毋得因此稍弛

己亥以右武衛大將軍仲先為登州團練使襲封魯國公仲先宗肅子詔以宗肅於先帝為藩邸初從兄故也

詔李憲歸本任依舊管勾經畧安撫司職事候應接

董戢與夏國首領議事畢依前降指揮

二十三  
日可考

庚子詔成都府減廢武寧第八指揮置馬軍騎射一指  
揮支黎州所買馬以四百一十人為額以本路言馬軍  
不足也 詔宗室克頌因心疾毆妻死外宅鎖閉歲久  
可免監守

辛丑經制熙河蘭會路邊防財用司上歲計合用錢帛糧草詔歲給錢二百萬緡以本司十案息錢川路苗役積剩錢續起常平積剩錢各二十萬權茶司錢六十萬川路計置物帛赴鳳翔府封樁坊場錢三十五萬陝西三銅錢監銅錫本脚錢二十四萬八千在京封樁券馬錢十萬裁減汴網錢十萬二千充自來年始戶部歲給公據關送候元豐十年終令經制司具支存數以聞禮部言大禮受誓戒應立班官乞免赴朝參從之舊例

受誓戒畢赴朝參故誓戒常於未明前或以為非禮故也 詔文字稽違職級兩上簿者職事官一上簿 詔諸路科買上供圓融抑配委轉運提點刑獄提舉司點檢舉劾聽逐司互察 詔知秦州吳雍依近降法分四場教漢蕃弓箭手

壬寅西南龍蕃貢方物 詔成都府路所發綱馬飼秣太僕寺日久病死者甚衆宜令豫編次當支軍分驗格尺進呈填諸軍 廣西經畧司言鬱林州澄海指揮子

第莫佛就言父貴為交賊所畧殺賊自歸由十將補指揮使未還營發赴招討司不知存亡詔賜絹百

癸卯都大提舉茶場陸師閔乞除放民戶賒欠茶罰息錢戶部言罰錢七萬緡乃朝廷封樁錢數詔本息正數並給限理納罰息錢除之 知太原府呂惠卿乞分河

東第九將嵐石州馬步軍八指揮歲更赴石州葭蘆吳堡塞防托從之 廊延路經畧司言塞門寨草積焚發

已差勾當公事錢景恪替將官郭祥守禦體量詣實詔



草場失職自當詰問寨主都監何因先替守禦將官令經畧司具析以聞

甲辰詔近差左班殿直武學諭陳濟方募兵捕殺河北賊今單安張謝留相繼已獲澶滑州羣盜頗已衰息宜令濟方赴闕各遣還所募兵其未獲賊委開封府界京西河北路監司督捕 嗣濮王宗暉言主奉安懿王祠事乞比宗姓使相郡王增俸祿詔歲增公使錢二千緡厨料給親王例三分之二 提舉開封府界保甲王球

乞買牝壯馬每等第增錢五十千以毛色土產分高下從之

乙巳三佛齊貢方物 荆湖南路轉運司言契勘荆廣等路鑄錢司牒準內藏庫牒檢會熙寧詳定三司例卷數內一項諸路坑冶課利金銀並納本庫除已牒潭州永興場具興發後來收到銀數以憑回報內藏庫照會本司坑冶收銀並係應副支用久來不係起發赴內藏庫之數或合行並赴內藏庫納即乞截自某年為頭寬

立年限逐旋帶納上批宜令依荆廣等路鑄錢司牒內  
該指熙寧詳定三司例卷內本條並赴內藏庫送納仍  
以元豐元年為始及依所奏均作五年帶納

此據御集  
元豐七年

九月八  
日事

丙午重陽節特御延和殿閱經制牧馬司進諸路簡買

馬并左第一監馬駒

舊紀書重陽節特御延和  
殿閱監牧馬新紀不書

權管

勾熙河蘭會路經畧司趙濟言已豫差李浩苗履統領  
漢蕃四將兵馬以備出入

戊申戶部尚書王存言準詔具析安守忠預繪像因依  
勘會所采臣僚勲績並於國史實錄考求事迹據本傳  
所載贈太尉安守忠有戰功故迹當預繪像其捧日左  
廂都指揮使欽州團練使安守忠史冊無載即無預繪  
像人數詔景靈宮改繪贈太尉安守忠像併推恩其家  
先是景靈宮繪像管勾官誤以欽州團練使安守忠充  
數而贈太尉安守忠之孫自言故命存考定而降是詔  
己酉校書郎王仲修為著作佐郎詔都大提舉茶場

陸師閔近以奏課登羨戶部已下本路驅磨保明可止  
令比部取師閔隨行帳案驅磨限半月保明取旨其緣  
事有勞官吏宜令師閔等上司勲擬賞 詔西京被水  
漂溺之家及秋田災傷五分戶並免來年夏秋支移折  
變從戶部員外郎張詢請也 提舉荆湖南路常平等

事張士澄轉運判官陳偲等上本路八州鹽舊賣及今  
來相度合增賣鹽數修為湖南廣東西鹽法條約總目  
戶部言欲依此推行俟就緒令本路轉運提舉官同立

法從之初塞周輔言韶連郴道州可以通廣鹽數百萬  
代淮鹽食湖南故奉議郎鄭亶亦乞運廣東鹽往湖南  
路郴全道三州詔送士澄偲相度至是奏上乃下監司

行之

舊錄元豐六年十二月戊子戶部言奉議郎鄭亶

乞通行廣東有餘鹽往廣西荆湖江西福建等路  
內西一路差三司副使塞周輔相度施行果利便亶昨  
乞運廣東鹽往湖南路郴道全三州乞選官相視詔送  
湖南提舉常平官朱本乃從彼移入此又稍刪潤之據  
元祐元年閏二月末呂陶奏議則湖南賣鹽實鄭亶發  
其端周輔奉行之據舊錄則湖廣江西福建皆亶創謀  
不獨湖南也初委張士澄陳偲在六年十二月甲申

資政殿學士通議大夫提舉崇福宮陳薦卒薦儀狀

魁偉辭氣莊重天性簡淡無聲色之好韓琦謂人曰廉於進而勇於退嫌疑間毫髮不處與人交久而不變如彥昇者無幾司馬光亦服薦之質直云

庚戌彰信軍留後駙馬都尉李瑋為建武軍節度使

舊紀

書此河北西路提點刑獄呂溫卿言霖雨為災已賑濟

欲乞坊戶渰溺財產比舊退落七分以上積欠及秋料役錢並展限至來年夏料其漂蕩家業者不候造簿年月先減免役錢以寬剩錢補助戶部言減放役錢欲據

家業物力之數於簿內改正其減役候造簿日均敷餘  
欲依溫卿所乞從之 呂惠卿言知石州燕復不依經

畧司指揮擅追守禦保甲已奉朝旨劾之竊以探報事

宜自當為備牽於文法或誤幾事欲望少寬繩墨詔劾

以聞

朱本刪去云  
事小不行

辛亥大燕集英殿酒五行罷以上服藥也

舊紀書上以  
疾不果終燕

戊午疾愈新紀同

放翁家世舊聞元豐秋燕神祖方

舉酒手緩蓋傾覆酒霑御袍時都下盛傳側金盞曲有

司以為不祥遂禁之明年宮車晏駕楚公進挽辭曰花

是高秋宴後萎楚公陸農師也意蓋謂此佛經天人五



衰如宮殿震身光滅之類花萎亦其一也已入筆記天人五衰記所無

癸丑傳宣閣門以服藥未安前後殿可權不視事

甲寅復罷朝參三日

丙辰詔濟陽郡王曹侑在病假百日特給寬假

戊午上疾愈知永興軍劉庠言昨詔許商人便錢二十萬緡安撫司收潤官錢以末鹽錢給還計置糧依原價兌與轉運司其兌到錢本司已封樁今夏豐稔可以廣糴乞再許入便每百緡加收潤官錢十三千詔支末

鹽錢二十萬緡餘依所乞

己未廊延路走馬承受李元嗣言軍士崔皋自截手指  
避出戰詔崔皋配本處禁軍雜役令劉昌祚體量軍中  
如此者斟酌施行 環慶路經畧司言殿直柴植守闕  
軍將杜大忠與孟真同討烏卜章等寨獲三百級無亡  
失蕃官例各轉資惟柴植杜大忠不蒙推賞詔各減磨  
勘三年

庚申命殿中侍御史蹇序辰右司員外郎路昌衡往熙

州劾李憲初御史臺鞠皇甫旦獄召憲赴闕至秦州會有邊警詔止之臺請憲三問不承即追攝詔用衆証結案乃遣序辰等就劾既又命序辰等即秦州移文劾憲

初二日令憲還此

詔州縣社稷及風伯雨師壇壝令提點刑

獄官先次點檢如有未應法式並令依應增改遇損壞即令修飾於壇側建齋廳三楹以備望祭從河東路同管勾保甲馬城請也 詔韓國大長公主錢氏長子賜

名忱為莊宅副使 詔中書省具御史臺察案去年所

彈治六曹諸司違法稽慢事若干所彈允當其違法官

司若干嘗書斷該罰若干用恩赦放免以聞

朱本改云用赦恩故

免者不得原減與舊本不同今從新本

成都府言新繁縣重光寺壁有

圖寫太祖御容乞修神御殿奉安詔令設板屋遮護扃

鎖河東轉運使天章閣待制陳安石權轉運判官奉

議郎莊公岳各罰銅二十斤轉運司管勾文字奉議郎

晏朋宣德郎王惟各罰銅十斤坐不應副麟府州賞功

絹也河北轉運司言自正月行鹽法至七月終收息

十六萬七千緡有奇 詔嗣濮王宗暉奏子與右內率  
府率女三人與縣主

辛酉河東路經畧司土蕃部裕勒星威密特與西賊戰獲級  
功狀樞密院擬裕勒星威密特各遷一資賜絹四十匹上批  
如功狀裕勒星威密特獲級並因伯雅克射倒所得恩澤二資  
可三人分受 廣西都鈐轄司言本路土兵闕額數多  
乞選使往福建江南廣東路招揀投換兵四千人詔見  
寄招換路分委官招換江南路三千六百人福建路千

四百人

癸亥戶部言元豐二年三司借未鹽錢五十萬緡市糧  
限四年還今已限滿欲望均作十年還自今年為始又  
熙寧十年借內庫錢尚欠四萬二千餘緡亦依此從之  
詔會通門承傳文字并祇候使臣委內東門司官責  
本蕃上名內中不犯賊濫請求獻遺賣買同罪保明狀  
經保明後改節事未發許經內東門司陳首上名三年  
無遺闕酬獎外更減磨勘三年

乙丑詔成都府應武舉王叙上書所言雖不盡中事實然乞於嘉州中鎮寨置場市馬及具道彼方蠻夷族姓道路委曲皆朝廷所未嘗知者宜下成都府路轉運鈐

轄司據所奏詢究利害考實以聞

朱本即於此書三司言已議差官於中鎮

寨買馬按嘉州編錄冊置場中鎮買馬在十月二十九日合附本月日元祐七年七月二十三日廢罷正史兵志云六年復置中鎮買馬場又誤也禮部言太廟祖祫合食始祖東向

昭南面穆北面者本室中之位也今設位戶外僖祖既東向矣而祖宗昭穆別為幄次殆非合食之義伏請自

今祿饗徹去逐位幄次即前楹通設幕以應室中之位  
詔恭依 詔應置巡檢下土兵路分並轉運提點刑獄  
提舉司每歲依春秋大閱法分定案試 提舉河北路  
保甲司言祁州鼓城縣巡檢下指使彭大因大水收救  
器甲溺死詔賜其家銀二百兩 是日西賊圍定西城  
將官秦貴等擊却之 此據十月二十五日秦新紀亦書  
乙丑夏人圍定西城熙河將秦貴  
敗之舊紀於十月癸巳乃  
書第五副將秦貴云云